

DEN AMBIENTE



POETS

E MOTIBO PAKICO ROBERT NO TA BAY TUMBA CONTEST



Pa e festival di tumba cu lo bay tuma lugar den e siman venidero aki, lo bay tin hopi tumberonan di alto nivel cu no lo bay participa den e grandioso contest aki. Entre e tumberonan aki tin tambe nos Rey di tumba di aña pasa Robert Jeando'r cu no lo bay participa y defende su corona.

DEN AMBIENTE a sostene un entrevista exclusivo cu e talentoso musico internacional aki, cu actualmente tin e record di a participa na ocho ocasion den tumba contest, y a sabi di triunfa como cinco biaha rey di tumba. Aunke cu Robert no lo bay competi, tog e la coopera engrande pa arregla cinco tumba pa e tumberitonan, y

nuebe arreglo pa tumba grandi, cual ta un total di 14 arreglo, locual sigur ta di aplaudi.

Na 1974 e la debuta cu e tumba "Pusha bay aden" y no a cay den premio. Na 1975 cu e tumba "Ata mi cos" e la finalisa na di tres lugar. Na 1976 Robert a bira pa prome biaha rey di tumba cu e tremendo tumba "Ban Bonsé". Na 1977 e la bolbe ripiti como rey di tumba cu "Slip'e". Na 1978 Robert a logra cu e tumba "Bolon Bonchi" di ser e prome cantante di tumba den historia, cu a sabi di ripiti tres aña sigui como rey di tumba. Na 1979 cu e tumba "Manera un wiel" e la finalisa na di tres

lugar, y den e mesun aña aki e la haya un oferta di e maestro merengero Johnny Ventura pa bay forma parti cu Los Hijos del Rey.

Despues di Los Hijos del Rey, e la bay forma parti pa e banda principal di Johnny Ventura. Hunto cu e maestro Johnny Ventura Robert a bay den giranan den diferente paisnan rond Mundo. Robert ta e prome musico Antillano cu a toca den e mahestuoso "MADISON SQUARE GARDEN". Despues di a haya hopi experiencia como musico internacional, Robert a bay forma su mes un banda na Republica Dominicana y tambe tabata arregla, y graba pa studio y television.

Despues di 11 aña den exterior Robert a dicidi di regresa su isla natal, y na aña 1990 e la bay participa den festival di tumba cu e tumba "Mi tin cu bay cu ne", cual e la logra di bay cu e corona tambe. Aña pasa e la bolbe bira rey di tumba cu e tumba "Wante", y mester a wanta su lagrima ora algun hende sin escrupulo cu no tabata di acuerdo cu e hurado tabata boe e na momento cu nan a anunciéle como ganador.

Awor cu e no ta bay participa e aña aki, hopi lo ta kere cu ta pa e motibo aki e no ta bay. Robert a declara categoricamente na DEN AMBIENTE cu aunke e no a spera algo asina riba su propio terra, tog no ta pa e motibo aki e no ta bay participa pa rey di tumba. Tin varios puntonan cu ta pasando den constelacion di ASOMA, cu Robert no ta di acuerdo. Tur e musiconan sa di esey, pero nan ta boca callao.

Hopi vez riba calla e sa haya expresion di pueblo cu ta bisé pa duna chens na otro. Robert ta pensa cu nan tin razon, pero alavez e no por yuda cu Dios a dune un don,

cu a cay na agrado di su pueblo for di tempo cu e la cumenza canta y toca. Algo cu no a cay den bon terra cerca Robert y tambe su fanaticonan cu a yame despues reclamando e punto aki, cu durante Sabado Sensacional e animador Gilberto Correa ta menciona e tumba "INDIAN" di Tatto como e tumba ganador di 1991. Awor e pregunta ta keda, ta kende ta e persona cu a bisa Gilberto cu e tumba "INDIAN" ta e tumba ganador? Den Robert su opinion cu e tumba aki ta un tremendo tumba cu a ser hopi gusta y cu tur respet pa Tatto, pero e no ta e tumba ganador. Pero como rey di tumba e por ta ken cu ta e mester wordo respeta, awe e la pasa cu mi pero mayan e por pasa cu un otro tambe. Ta un berguena grandi pa nos musiconan ta dilanti un pueblo cu ta para mira y scucha di cierto cosnan cu ta pasando actualmente den farandula. Pueblo ta cansa di e mesun storia di tur aña. Si e musiconan mes no cambia nan mentalidad erroneo nunca nos lo yega na

algo, cuminzando for di ASOMA te na e ultimo musico. Nunca nos por bay dilanti cu e sistema di tira piedra sconde man. Tambe decisionnan cu ta wordo tuma solamente pa dos persona den un directiva cu ta consisti di mas persona. Sistemanan di boycott y traicion ta adiarro entre bandanan y musiconan na Aruba. Un di e ehemplonan mes ta e recien calypso contest caminda nan a trata pa boycotia nos maximo estrella Mighty Talent. Nos ningun no ta perfecto pero nos sa di yuda otro y tog wordo traiciona segun Robert. Robert a declara cu e por

yena 100 pagina si e sigui relata, pasobra ta hopi tin pa papia y aclaria pa wordo dreacha. Pero si a yega tempo pa nos musiconan bira homber y para den nan sapatonan y no laga un so habri boca den reunion pa derecho di nos tur, y tog despues wordo traiciona. Robert a finalisa e entrevista aki bisando "AQUEL QUE LE CAIGA EL SÁYO QUE SE LO PONGA" !!!

BLUE WAVE Nightclub

Yen di ambiente
y gozo!!

DIASABRA
AMBIENTE
NON STOP
CU
PRIDE

